



25.04.2023

UPA2023/52

Sanaartorneq pillugulnatsisartut Inatsisaata allanngortinneqarnera, najukkat pillugit Inatsisartut Inatsisaata allanngortinneqarnera kiisalu Grønlands Tekniske Organisationi pillugulnatsisartut peqqussutaata allanngortinneqarnera pillugu Inatsisartut inatsisaat (Sanaartukkani piusuni nukimmik sipaarniarluni aaqqissuussinerit kiisalu nuna tamakkerlugu Illuutit Inissiallu nalunaarsuiffiannik BBR-mik pilersitsinissamut Naalakkersuisunut piginnaatitsissut)

(Ineqarnermut Attaveqaasersuutinullu Naalakkersuisoq)

Sanaartorneq pillugu Inatsisartut Inatsisaata allannguutissatut siunnersuut soqutiginarloq pillugu Siumumiit imatut oqaaseqaateqassaagut:

Siullertut erseqqissaatigissuarput Siumut partii ineqarneq pillugu ersarissunik arlalinnik anguniagaqarmat ilaatigut imatut allaqqasunik: Siumup anguniarpaa kikkut tamarmik peqqinnartumik inissaqarnissaat aammalu imatut allaqqasunik anguniagaqarpugut: Inissiat pitsaasuunissaat ineriartornermullu naleqquttuunissaat Siumup anguniagaasa pingaarnerit ilagaat.

Siunnersuut pingaarnertut marlunnik siunertaqarpoq: 1) Sanaartukkanik naliginnaasunik aserfallatsaaliuineq ilutigalugu sanaartukkat nukimmik atuinerisa annikillisinneqarnissaat, (2) kiisalu pisortat ingerlatsinerini sanaartukkanik, inissianik teknikkikkullu atortuutit nalunaarsuisalernissaq.

Inatsisissatut siunnersuutaasoq tunngaviatigut Siumumiit iluarisimaarparput ilisimavarpummi siammassissumik illuutit /inissiallu pitsaassutsikkut inissisimaffiat amerlasuutit pitsaanagerinnaasoq, taamaasillunilu kiassarnikkut ulluinnarni atuneq qaffasissumiinnaasarluni. Tamatuma millisarneqarnissaa siunnersuummi qitiusumiimmat avatangiisit eqqarsaatigalugit pitsaanagerusumut alloriartoqartussaana takusinnaagatsigu tunngaviatigut iluarisimaarinnippugut.

Illuutit Inissiat nalunaarsuiffimmut allatorneqartalernissaat tunngaviatigut ilanngullugu tamakkiisumik taparserparput, taamatut nalunaarsuisalernerup illullu silataasa uuttortarneqartarnissaat aammalu illup iluisa atortuutitigut nalunaarsorneqartarnissaat ilanngullugu iluarisimaarlugu oqaatigissuarput, taamatullu ingerlatseriaatsip atuutsinneqalerneratigut alloriaammik pitsaasup tungaanut pisoqarumaartoq upperalutigu taamatut suleriaaseqalernissap kingunerisaanik sakkumik pingaarutilimmik pigisaqalernissaq takusinnaalluarlutigu.

Ilaatigut ersarissaaqqinnissat kiisalu ataatsimiititaliami susasaqartumi suliaqalernermissuernerneqarsinnaasut takusinnaasagut eqqartorneqarlussasut kaammattuutigissuarput soorlu: inatsisissatut siunnersuummi paragraf 19-imi lmm. 2, aamma paragraf 17 b malillugu, allaqqasoq: *Nalunaarsuinissami paasissutissanik pissarsinissami sanaartukkap silataanik misissuinissaq uuttortaanissallu siunertarlugu Kommunalbestyrelsi eqqartuussivimmi aalajangiinertaqanngitsumik isernissaminut piunasaqarsinnaavoq.*

Oqaaseq **isernissaminut** kalaallisuuani erseqqissarneqartariaqartoq isumaqarpunga.



Tamanna arlaagut illumik piginnittumut/nut pisinnaatitaaffinnik imaluunniit illup silataata pigineqarneranik ilisimatitseqqaarani uuttortasinnaaneq piginnittut inatsisitigut pisinnaatitaaffiinnik kalluaannginnersoq eqqarsaatigalugu ataatsimiititaliami susassaqtumi sammineqassasoq kaammattuutigissuarput.

Tusarniaanermi akissutit eqqarsaatigalugit Naalagaaffimmi politiit Illuutinut atorneqartunut tunngatillugu BBR-qarnissami sanioqquitsisoqarnissaa pisariaqassasumik allaqqasoq-mik allataqarput tamanna aammalu Tusass-ip akissutaani illuutinut pigineqartunut taamatukanneq siunertaqartumik atortuutit eqqarsaatigalugit isornartorsiuisimasoq takusinnaavarput, allallu tusarniaanermi akissuteqarsimasut tamaasa immikkut taakkartunngikkaluarlugit oqariartuutigisaat assigiinngitsut sukumiisumik ataatsimiititaliami sammineqarnissaat kaammattuutigaarput.

Siumumiit naatsorsuutigaarput Illuutinik Inissianik teknikkikkullu atortuutinik nalunaarsuisoqartalerpat aammalu siunertaasup nukimmik atuinikinnerulernissap anguniarneqarnissaanut tunngatillugu nalunaarsuiffik piulersusaaq sakkutut pitsaasutut pigineqalerumaartoq takusinnaavarput, taamaasilluni siunissami pingaarutilimmik inissiat illullu pigineqartut eqqarsaatigalugit iluarsaasinnaanissanut tunngavisseeqataalluarumaartutut isigalutigutaaq.

Taamatut oqaaseqarluta Inatsisissatut siunnersuut tunngaviatigut taperserlugu ataatsimiititaliamut susassaqtumut suliarineqartussanngorlugu ingerlateqqipparput.

Jens Kristian Therkelsen, Siumut